



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

Sachin Pilot-i anogo ka lumia longkak ait

Taiwan Tir Tsai Ing-wen-i China military exercise aitsü



VOL. XX NO. 179 (ADOK 179) DIMAPUR RASEMNÜ (WEDNESDAY) RONGCHII (APRIL) 12, 2023 ₹ 5.00

## BJP-i Assam LS menden 12 nung takok angutsü: Amit Shah

**Dibrugarh, April 11, 2023 (Agencies):** 2024 Lok Sabha elections nung BJP-i Assam nung menden 14 nungi 12 nung takok angutsü ta Union Home Minister Amit Shah-i metetdaksü.

BJP-i Lok Sabha menden 300 tema nung takok ngua Narendra Modi-i kümsük tasembenbuba atema Prime Minister inyaksü ta pai ashi.

"North East nung BJP tashaita akümer aser iba ajanga party tejakleni aoba sayur. Assam nung nem tenüsang agütsür kechiyong nenok vote ajanga North East renloker" ta Amit Shah-isa ashi.

"Assam kübok 70% tashi nung ashishitep aketba Armed Forces (Special Powers) Act, 1958 (AFSPA) agienogo. Külen Bodoland o Karbi Anglong nung yimjung aruogo aser kidanger state tem den arrtsü mangatettep ken o tem angatettepogo" ta paisa ashi.

"Taoba mapang Assam ya 'andolan' (agitation) aser

'aatankwad' (terrorism) atema tetshi saka tangbo yimjung aruogo aser nübertemi Bihu kenten ola nung tsüngsangteper" ta Shah-isa shisem.

Dibrugarh nung BJP office yanglutsü lung azüngtsüba sülen pai osangbener den jembidang "BJP ya organization-based party ka lir aser office ya party inyaksangshi ajak indang centre lir" ta Amit Shah-isa ashi.

North East nung state asem nung Assembly elections agiogo aser state asemprong sorkar nung BJP dena lir, ta paisa shisem.

PM Modi lenisüba kübok NE state 8 nung NDA sorkar lir aser iba ajanga North East nung terenlok lir, ta Amit Shah-isa metetdaksü.

"Mapang kabo Northeast ya Congress indang tesem ka ama züngshi saka Rahul Gandhi'er yatra (Bharat Jodo Yatra) agiaka tawa NE state asem nung assembly elections agidang Congress-i takok mengutet" ta paisa ashi.

## Nagaland nunga COVID-19 indang Mega Mock Drill agiogo



**Kohima, April 11, 2023 (TYO):** India nung nisung aika dak Covid-19 putetba atema anogo linük ajungalen anogo ananü Mega Mock Drill agiba nung Nagaland-ia shilem agiogo.

"Mongulbarnü Nagaland nung Mock Drill agiogo aser iba ya mozü kidang mozü, yipden, ICU yipden, medical osettsüert, medical oxygen, human resource aser vaccination coverage osang metettsü atema agi" ta Directorate of Health & Family Welfare Principal Director Dr. Vibeitunuo M. Sachu-i ashi.

"District ajak nung Public aser Private sector nung Health Units ajaki Mock Drill nung shilem agi. Maneni, Deputy Commissioners, Chief Medical Officers, Medical

Superintendents, District Surveillance Officers aser IDSP, DHFW District Surveillance Units ajanga ketdangsüa liasü" ta laisa ashi.

Nagaland nung Mega Mock Drill nung Health Units 193-i shilem agi ta Dr Sachu-isa shisem.

Health & Family Welfare minister P. Paiwang Konyak aser Commissioner & Secretary, H&FW, Kikheto Sema na lenisüba kübok Mock Drill agi, ta laisa metetdaksü.

Tanü Health Minister P. Paiwang Konyak, Commissioner & Secretary, H&FW Kikheto Sema aser Principal Director, DHFW Dr. Vibeitunuo M Sachu nungeri Mon district nung mock

drill reprang aser iba sülen parnoki Mon Medical College yangluba tesem semdanga liasü.

### India nung XBB1.16.1 sub-variant putetogo

India kübok state aser Union Territory 13 nung Coronavirus indang XBB1.16.1 variant putetogo.

"India nung tawa Covid kanga putet arudang sample 234 nung XBB1.16.1 mutated sub-variant aliba putetogo" ta Indian SARS-CoV-2 Genomics Consortium (INSACOG)-i Mongulbarnü metetdaksü.

XBB1.16.1 ya Omicron indang kanga menatepba XBB1.16 variant nungi adokba lir. XBB1.16. ya Delhi, Gujarat aser Haryana dena state aser Union Territory 13 nung putetogo ta INSACOG-i ashi.

State aser Union Territory 22 nung sample 1,774 nung XBB1.16 variant aliba putetogo, ta parnokisa ashi.

India nung Mongulbarnep 8:00 ako tashi tesüba ghonda 24 tsüngda nisung 5,676 dak Covid putet. Parnok züngsema tang nisung 37,093 anepaludar ta Union Health Ministry-i metetdaksü.

Kasa mapang Covid puteta alir nisung 21 asü aser parnok züngsema Covid agi tasür ajak agi 5,31,000 kümogo ta Union Health Ministry-isa ashi.

## Bharat Gaurav Tourist Train senzütsü



April 11, 2023 nü Dimapur Railway Station nung Chief Supervisor, Tourism, IRCTC Guwahati, S Khobung den ketdangsürtemi osangbener den jembiba angur.

**Dimapur, April 11, 2023 (TYO):** May 27, 2023 nü Dibrugarh nungi Bharat Gaurav Tourist Train mezüngbuba senzütsü aser iba train ajanga nungtugu 'religious tourist circuit' sema senzütsü.

Iba ya Indian Railway Catering & Tourism Corporation Ltd & NF Railway ajanga Ek Bharat Shrestha Bharat kübok tenzütsü.

"Iba tour ya aonung 10 aser anogo 11 atema asütsü aser Ayodhya, Shree mata Vaishno Devi, Prayagraj o Varanasi semdangtsü" ta Dimapur Railway station nung Mongulbarnü Chief Supervisor, Tourism, IRCTC Guwahati, S

Khobung-i osangbener dang ashi. Taktang 14 aliba train nung sleeper class 8, AC III coach 3 aser pantry car ka adentsü, ta pai ashi.

Iba tour atema sleeper class nung nisung ka nung Rs. 20,850 aser AC coach nung nisung ka nung Rs. 31,135 agitsü. Iba nung achiajemba aser ayipdak ajak dena lir. Tour nung s e n z ü n ü r t e m i www.ircctourism.com nung online ajanga booking asütsü akok aser EMI facility angutsü, ta S Khobung-i metetdaksü.

Indian Railways-i Bharat Gaurav Train scheme kübok rail tourism atema 33% ajemtsür ta paisa ashi.

## Centre-i April 14 'public holiday' sangdonger

**New Delhi, April 11, 2023 (Agencies):** April 14 nü BR Ambedkar tasoba anogo amungtsü atema Centre sorkari 'public holiday' sangdongogo.

BR Ambedkar dang 'Father of the Indian Constitution' ta ajar.

"April 14, 2023 (Hokolbar) nü closed holiday asütsü lemtetogo. Iba ya Dr. B.R. Ambedkar tasoba anogo lir aser India ajungalen Industrial Establishments dena

Central Government Offices ajak sodi anogo asütsü. Iba ya Negotiable Instrument Act 1881 nung Section 25 kübok tashi agüja aliba ama sangoktsür" ta sangdong ka nung metetdaksü.

Supreme Court of India (SC)-ia April 14 nü court aser registry shibangtsü osang metetdaksüogo.

"Chief Justice of India-i Supreme Court of India aser

Registry April 14, 2023 nü shibangtsü tetuyuba agütsüogo" ta SC indang sangdong ka nung metetdaksü.

April 1, 2023 nungi academic year tenzüka sülen tan ita school tem anogo 14 nungi 15 jungnüa sodi anogotem asütsü imlar.

Taküm academic year nung school aser tanga shisaliok rejutem anogo 70 tema sodi angutsü imlar.

## Bihar nung Meghalaya nunger arogo lennir 2 merenshi

**Shillong, April 11, 2023 (Agencies):** Bihar nung Meghalaya nunger arogo lennirtem dak tim mastüba mapa inyakba aitsür ta Meghalaya Chief Minister Conrad K Sangma-i ashi.

CM Conrad-isa Meghalaya police dang Bihar police den osang agiteptsü tetuyuba agütsüogo.

Laitumkhras Presbyterian Church nungi Pastor RG Laloo aser Elder T Nongkhaw na junga lir aser tena Patna Police-i anepaludar, ta Meghalaya DGPLR Bishnoi-i ashi.

Alamganj Police Station kübok tesem ka nung Meghalaya nunger arogo lennir ana dang o tamajung

ashiba dak alaka teka mesangshi, ta Patna Police-i metetdaksüogo.

Tashiyim agi Hindu nunger Khristan yimsü dangi meyipdaksür ta olulu ajanga Bajrang Dal pusemer kari raratep. Iba mapangji police tesem tonga ao aser arogo lennir ana police station-i anir oa FIR zülü, ta DGP Bishnoi-i ashi.

DGP-isa Bihar police dang tena Patna toktsür mapuso tashi lendong nungi kümsüka ayutsü mepishiogo.

"Meghalaya nunger arogo lennir ana Patna nung tim mesüi benshiba indang osang tau kar prokshir. Tena dak teka mesangshi saka tebang agi

dang o ashi" ta Meghalaya deputy chief minister Prestone Tynsong-ia metetdaksüogo.

"Meghalaya nung lokti tsüngda mepetmesü adoktsü shisabulua bilemba agi ni iba osang jangjatsür. Nübertemi social media nung osang tai meprokshitsü mepishir. Sorkari iba tatalokba angashiogo aser nungdakba mapa inyakogo" ta Tynsong-isa ashi.

Laitumkhras Presbyterian Church nungi arogo lennir ana ya Bihar nung church mission field nung missionary tem den ajuruteptsü atema aodang Bajrang Dal züngsemtemi tena dak teka sangshi ta osang prokshi.

### Sorkar noksa IPR Department dak keta lir: Advisor Imkong L. Imchen



Advisor, Imkong L. Imchen den Director & Commissioner aser Secretary nungertem noksa nung angur

**Dimapur, Rongchii/April 11 (TYO):** Department of Information & Public Relations ajanga Advisor, Information & Public Relations, Soil and Water Conservation, Imkong L. Imchen nem tenüngsang agütsüba sentong ka April 11, 2023 nü IPR Conference Hall, Kohima nung ayongzüka liasü.

Advisor Imkong L. Imchen-iba sentong nung jembidang taoba mapang pa IPR indang minister inyangdang Department of Information & Public Relations den ajangshibatam tongmelang agi rasaa shia liasü.

Sorkar noksa ya IPR Department dak keta lir, koba ajanga nüburttem nem osangtsüsang lemsatepba nung tongtipang shilem agir, ta pai ashi.

Pai langka tajung kar adoktsü asoshi tajungtiba nung inyaksü merangtsü, ta ashi. Pai department ketdangsür aser staff tem dang temolung agüja inyaksü ayongzüc aser nüburttem tenzüksü asoshi pa lir ta ashi.

Sentong nung Director, Dzüvinuo Theinuo-i jembidang,

Department asoshi bilemstüba lenir takotet ka aruba ya department atema tia taka, ta ashi.

Department inyakyim tajungtiba akumtsü asoshi ketdangsür aser staff temi amalitep akatsü, ta lai ashi.

Lai Advisor dang Directorate nungi state kübok tesem balala nung Information Centres indang rateta ashi.

Item dak alaka Delhi aser Raj Bhawan nung department indang PROs lir aser Nagaland Civil Secretariat nung Information Cell lir, ta ashi.

Department ajanga anogoshi Naga News aser ita shia Warrior adokba den külemi küm shia calendar aser diary amala adoker, ta Theinuo-i ashi.

COVID sülen Department nung temelenshi jenti lir aser department ajanga state level sentong aser danga tongtipang sentong tem teti live stream yoker, ta lai ashi.

Film aser iba dak sendakba maparen nung nodal department ka ama film yanglurtem yariba nunga tongti

shilem agia arur, ta ashi.

Ajidang masü Department ajanga Facebook, Twitter aser Instagram ama social media sapang balala nung teyakyak shilem agir, ta lai ashi.

Department ajanga district 11 nung Public Address System inoka lir aser district kar nung LED display inokogo, ta lai ashi.

Sentong nung Commissioner & Secretary IPR, V. Maria Yanthan, IAS ajanga jembidang, Imchen lenisüba kübok department tejakleni aotsü imlar, ta ashi.

Department indang ketdangsür aser staff temi bendanga agütsür tenzükba atema lai pelaba lemsatep aser parnok dang timtem balala ajuruaka meranga inyakba tanüla mesamatsü ayongzüka liasü.

Iba sentong nung menden Joint Director, I. Simon Teila liasü aser Joint Director, Asangla Imsong-i melepzüing o jembi.

Iba sentong tembangba sülen Advisor Imkong L. Imchen-i Directorate nung Library semdanga liasü.

### Lokti ajungtsü asoshi kin balala lungjemtsüla: Advisor Tovihoto



Dimapur nung April 11, 2023 nü Iftar party alidang Muslim Youth Dimapur züngsem temi H. Tovihoto Ayemi den tepela lemsatepba noksa nung angur.

**Dimapur, Rongchii/April 11 (TYO):** Lokti tiptema aser terenlok nung alitsü asoshi tamangba yimsü aser sobaliba balala aliba nüburttem tsüngta yimjung aser tesunep nung alitsü nüngdaker, ta MLA aser Advisor, Tribal Affairs and Election Department, Nagaland, H. Tovihoto Ayemi-i ashi.

Hombarnü Idgah Ground, Dimapur nung Muslim Youth Dimapur ajanga ayongzüc Iftar party nung jembidang pai iba olen ya shia liasü.

Tamangba yimsü balala nungi nüburttem yimjung nung aliba ajanga Dimapur tebour

jungdaksür, anungji asen lokti nung yimjung aser tesunep wazüka ayutsü asoshi pei shilem inyaksüla, ta pai ayongzüc.

Tamangba yimsü kechia azüdokshitsü mesayur, tamangba yimsü ajak nung temeim aser tesunep tiyong südaksür aser tesunep nung alitsü asoshi tangatetba shidak nung ajaki anidaksüla, ta Tovihoto-i ashi.

Tesendaktep aser telungtem tali yangertsü mechi tamangba yimsü aser sobaliba balala amshirtem balala jaokba atema Muslim Youth Dimapur nem tenüngsang agüja jembidang ano

COVID lockdown aser kitsük-kirong lendong mapang Muslim lanurtemi nüburttem nem teyari agütsüba asoshia Tovihoto-i pelaba lemsatepba liasü.

Meimchir tenzücba ya Tsüngrem tenzücba lir, ta pai ashi.

Muslim Youth Dimapur nungi ketdangsür kati iba sentong nung jembidang, nüburttem tsüngta temeimtep aser yimjung adokdaksütsü nükjidong nung tamangba yimsü balala nungi nüburttem jaok aser Dimapur ajungtsü asoshi Muslim lanurtemi bendanga agütsür inyaker, ta ashi.

### SVC ajanga yimtsüng ajungtsü atema Advisor Zhaleo ajuruajembi

**Dimapur, Rongchii/April 11 (TYO):** Sovima Village Council puri April 11, 2023 nü Advisor, Municipal Affairs and Urban Development, Zhaleo Rio den Pesozou Khel, Sovima nung par kidang ajuruajembi liasü.

Iba mapang SVC ajanga Advisor den yimtsüng tajungba kumdaksütsü asoshi putu menden indang sentong balala lemsatepba liasü aser item rongnung lenmang, lanes aser bylanes ajunga yimtsüng

tenzüker, lenirtem tenüng jaloktsütsü, National Highway aser yimtsüng telungzüc nung lenmang balala müreka ayutsü indang jembi aser iba atema kaket reju aser arogo tem dang ita shia lokti nübudok alitsü asoshi ayongzüksü lemteta liasü.

Maneni parnokki lenmang nung solar lamp inoktsü jembi aser nüburttem dang akoker temi pei aliba tesem nung CCTV camera inoktsü mepishitsü lemteta liasü.

### Laishir aseme züluba 'Tanela Teremsep' kaket saya



**Dimapur, April 11 (TYO) :** Tanü putu nung Khristan yimsüsa asüyonga tesayuba aser teratetba balala sayuba agi amangba purtem aika mangmandaksüba mapang, item tiyazü tesayuba nungi amangba purtem jenbua alitsü asoshi tangatetba agütsüba kaket ka tenüng agi 'Tanela Teremsep' ta asüba kaket ka yashi Dimapur nung Dimapur Ao Baptist Arogo nung sannüker Rev.I.Wati-i sayatsüogo.

Iba ama amangba purtem tanela taküm kümdangshidaksüba kaket ka zülutsü atema Wt.Sentila Ozüküm dangi Tsüngrem tejembi aruba ajanga lai ajungshia Tsüngrem o nung akuteta azüngba laishir asem Dr. Menjiwapong Jamir, Wb.Matsüng Longkümer aser Jongshimanen par aseme iba kaket ya zülü.

"Tanü putu ya Google aser Whatsapp tamang bener aliba amangba purtem aika lir, tetezü sarasadema Laishiba zünga Tsüngrem o angatetsü meranger masü saka tangari Google aser Whatsapp nung renemer belenshiba kisüng nung nendaker aliba tesayur aser

tamangertem lir, ibayongji tamang nung melamelaa azülar aser melamelaa mashileni oadoker alir," ta iba kaket zülurtemi shia lir.

Joko, tanü lima ya Post-Truth putui yiogo. "Post-Truth tetezü Ochi jembi mapang süiogo ta asüba lir. Tiyazü odi-odia jembi, ochimashi mapa inyaksü kecha marendakba, anemponga meshiteta aser asüngteta alitsüji tejen yimsü (out dated) ka ama iba Post-Truth tesayuba yagi sayur. Iba ama putu ka nung Khristan taküm ka alitsüji kanga tasak kümogo," ta iba iba kaket zülur laishir asemisa shisema lir.

Iba kaket nung tanela nung asentenshiba yimya, tai tesayuba, tanela temeshi, tanela süngjangtem aser arogo inyakyim indang Lai tesayuba aser teratet agüja lir.

Iba kaket sayaba sentong nung Dimapur Area Ao Baptist Arogo Pastors' Fellowship nung tir aser sannüker Wb.Temsü Jamiri kaket meshitetba sarasadem agia liasü.

Iba kaket aginertemi mobile number 98568 90573 / 70055 08210 nung tongteprateptsü akok.

### Longleng nung aluyimer nem hadir lema agütsü

**Dimapur, Rongchii/April 11 (TYO):** Department of Agriculture Office, Longleng ajanga April 11, 2023 nü District Agriculture Office nung SMAM 2022-2023 kübok Longleng district nung aliba aluyimer nem aluyimba maparen nung amshiba hadir lema agütsüba sentong ka ayongzüka liasü, kong alakteta jaoker ama EAC Longleng, S. Chingmei dena liasü.

S. Chingmai-i iba sentong nung o tatsüka jembidang, district ka lenmang shidak nung aotsü atema sorkari nüburttem ajungtsü asoshi scheme balala agütsüba metettsü nüngdaker, ta ashi.

State sorkar aser Department of Agriculture

ajanga aluyimer yariba asoshi lai pelaba lemsatepba liasü.


Sorkari hadir agütsüba indang teyari angurtem nungi takum kuli lemsatepra, ibaji ajanga terenlok tajung alitsü, ta lai ashi.

Laisa nüburttem dang tarutsü asoshi metsüjang wazüka ayutsü aser hadir anepalua amshitsü ajungshia liasü.

Iba sentong nung DAO Longleng, S. Yongchang Phom ajanga iba sentong ayongzücba nükjidong rateta ashi aser Pongching yimtsüng nungi Samoi ajanga aluyimer tenüng nung tepela o jembi liasü.

Iba sentong nung AI Longleng, M. Chingsang Phom menden liasü.

# Sachin Pilot-i anogo ka lumia longkak ait



Jaipur kübok Shaheed Smarak nung taoba BJP sorkari ochi mashi inyakim benoka inyakba anema Congress lenir Sachin Pilot lumia longkak aiba noksa nung angur.

**New Delhi, Rongchii/April 11 (Agencies):** Congress lenir Sachin Pilot-i Mongolbarnü lumia longka aitba nikongtsütsü 4:00 ako shi nung tembangba sülen pai maneni ochi mashi inyakim anema nokdaksü ta ashi.

State nung Bharatiya Janata Party (BJP)-i sorkar kümteter aliba mapang ochi mashi inyakim kar benoka inyaksangshiba dak sendakba nung par sorkar dang jenjang tapet agitsü khanga Pilot-i Mongolbar anepdang Jaipur kübok Shaheed Smarak nung longkak ait tenzük.

"Onoki state nung taoba BJP sorkar ochi mashi inyakim anema jenjang tapet

agitsü ta nüburttem nem tenanzükba agütsüogo. Ni taoba BJP sorkar anema Congress sorkar nem jenjang agidaksüner," ta Pilot-i osangbenertem dang ashi.

Congress-i iba sentong ayongzüka magitsü atema tekümdangtsü metetdakjaka taoba Rajasthan deputy chief minister yagi iba sentong ayongzüka agiogo. All India Congress Committee (AICC) Rajasthan in-charge Sukhjinder Singh Randhawa-i, state sorkar anema iba amala longkak aitba sentong ayongzüka agiba ya party anema inyaksangshiba ka aser party tejangraba anema lir, ta ashi.

Iba ajanga Pilot-i Rajasthan

chief minister Ashok Gehlot anema inyakim tasen ka tenzükogo. 2018 küm December ita Rajasthan nung Congress-i sorkar kümtetba sülen Pilot aser chief minister Ashok Gehlot na tashi toktepa arudar.

Deobarnü 'dharna' indang sangdongba mapang Pilot-i, "election agitsü ita trok tenet ka anunga aliba mapang onok anema nokdakertemi mangatetep kar lir ta osang prokshitsü akok. Anungji tim jenjang yakta agitsü nungdaker, ajita asünungdang Congress kübok inyakertemi o aser inyakim nung kecha tebandang mali ta bilemtsü," ta pai ashi.

# SGPC obendangertemi Amritpal nem teyari agütsürtem nem legal teyari agütsütsü

**New Delhi, Rongchii/April 11 (Agencies):** Khalistan sayutsünger Amritpal Singh nem teyari agütsür Papalpreet Singh apuba sülen anogo ka lir Shiromani Gurdwara Parbandhak Committee (SGPC)-i yokba obendanger telok ka Assam kübok Dibrugarh tongogo aser parnoki tepuokdak yua aliba Amritpal nem teyari agütsürtem ken o agizüka inyaksangshitsü.

Punjab police-i tawa Amritpal pusemertem meita ao aser parnok 100 dak tema puogo. Parnok timba chiokatokogo, ajisüaka pa den kanga junga sendaktepa alir parnok ti National Security Act (NSA) kübok puogo aser

Dibrugarh nung tepuokdak yua lir.

SGPC ketdangsurtemi ashiba agi, obendanger yagi tepuokdak yua aliba Sikh nung ti-prongla den ajurutepego, shirnok NSA kübok sota yua lir, aser ken o dak sendaka aliba kuli kaketterm ajak tepuokdak ketdangsurtem ket nungi meshiogo.

Obendangerter rongnung SGPC züngsem aser Advocate Bhagwant Singh Sialka, Advocate Mandeep Singh Sidhu (actor-activist Deep Sidhu, aser Waris Punjab Da ngutetsang adianu), aser Advocate Rohit Sharma densema lir aser parnoki tepuokertem nem legal teyari

agütsütsü.

Obendangertem isa Dibrugarh Central Jail nung yua aliba tepuokertem kinungertemi parnok nem kasa mapa nongloksüogo, ta ashi. Aija alirtem atema Legal Aid Counsel asütsü Dibrugarh District Legal Service Authority-i Advocate Samir Todi shimogo.

"Punjab nungi legal team den Legal Aid Counsel Advocate Samir Todi-i yashi temzüng ozüng dak ajemdaker inyayim tenzükogo," ta Advocate Bhagawant Singh Sialka-i ashi.

Papalpreet, shiba tashi Amritsar nung apu, pa security dak sendakba nung Dibrugarh jail-i belener aotsü akok.

# PM Modi-i Brehostibarnü appointment letters 71,000 lemtsütsü

**New Delhi, Rongchii/April 11 (Agencies):** Ato Kilonser Narendra Modi-i, April 13 nü tawa mapa nung shimoker aliba nisung 71,000 shi nem video conferencing ajanga appointment letters agütsütsü aser paisa, parnok den sensak asemstü, ta Mongolbarnü PM office sangdong ka ajanga metetdaksü.

Iba sentong ya Rozgar Mela' drive nung shilem ka lir. Iba sentong kübok nisung lakh 10 nem mapa agütsütsü imlar. PM office sangdong ajangsa, Ato Kilonser-i mapa adokdaksütsü atema kanga tongtibangsa bendanga agütsür aliba ataloktsü atema jenjang agiba rongnung iba ya ka lir, ta ashi.

"Rozgar Mela ya tatemdaddak sür tarutsü nung mapa timba adokdaksütsü imlar aser iba ajanga lanurtem empowerment atema aser linük

terenlok nung shilem agitsü atema maongka agütsütsü," ta kasa sangdong ajanga metetdaksü.

Linük kübok tesem balala nungi shimba nüburttem yagi Centre sorkar kübok train manager, station master, senior commercial-cum-ticket clerk, inspector, sub-inspector, constable, stenographer, junior accountant, postal assistant, income tax inspector, tax assistant, assistant professor, teacher, librarian, nurse, probationary officers, PA aser MTS amala mapa balala agizüka inyaktsü.

Maneni mapa nung tasen shimertem atema online orientation course 'Karmayogi Prarambh' ajanga sorkar kübok department balala indang inyakim angazütsü asoshi parnok nem maongka agütsütsü, ta kasa sangdong ajanga metetdaksü.

# Shah-i Gandhi aitsü; Modi tasembenbuba PM akümtsü ta ashi

**New Delhi, Rongchii/April 11 (Agencies):** Union home minister Amit Shah-i Mongolbarnü, 2024 national election agiba sülen absolute majority ngua Narendra Modi tasembenbuba Ato Kilonser akümtsü ta ashiba den Rahul Gandhi aija pa melenshitsü mapang tongja tongogo, ajita mesüra Congress party linük ajanga nungi aitoktsü, ta ashi.

Pai, taruba general election nung Bharatiya Janata Party (BJP) Lok Sabha menden 543 nungi 300 dak tema akoktsü ta ashi. "2024 Lok Sabha election nung BJP-i Assam nung menden 14 aliba nungi 12 akoktsü ta ni Congress dang shiner," ta pai Assam kübok Dibrugarh nung lokti senden ka nung o jembiba mapang ashi.

2019 küm election nung BJP-i menden 303 akok aser Congress-i menden 54 dang kokteta liasü. 2014 küm BJP ya küm 30 tsünga parnok kijai Lok Sabha menden tesadang dak timba akokba mezüngbuba party aküm. Iba küm parnok menden 272 koka liasü.

Shah-i ashiba agi Gandhi memelenshitsü. "Pai bendangleni oa linük tenüng menütsür. Linük meimba lisopor kati iba amala yimya benshitsü na," ta Shah-i asüngdang. "Rahul na melenshitsü mapang tongja tongogo, ajita mesüra Congress ya northeast nung ama linük ajanga nungi aitoktsü," ta pai ashi.

Taoba ita United Kingdom nung Indian democracy aser Parliament indang jembiba sülen Gandhi ya BJP puri kanga mejungi aija arudar. Cambridge University nung sensaksem mapa pai jembiba onük kar atema sorkari Gandhi dang tatok meshitsü khanga liasü. Gandhi-i Indian democracy lendong

nung lir aser pa densema yimden yimsüsürtem aika meitdar ta ashi.

Iba olen lemsatepba atema Parliament Budget Session kanga minpronga liasü, ajisüaka Congress-i ashiba agi, American securities research firm Hindenburg Research report ka ajanga Gautam Adani-i aniba Adani Group aitsüba nung meranglokdaksütsü atema BJP-i pai jembiba o anema longkak aita liasü.

Shah-i ashiba agi, Modi-i bendanger ket nungi linük kümzüka yuogo aser northeast nung yimjung bener arutsüogo. "Ajisüaka Congress-i pa leper totsüner. Nenoki kodaka Modi aitsür yamaji BJP indang lotus apongtsü," ta pai ashi.

Shah, shibai Upper Assam atema BJP zonal office yanglutsü asoshi virtually nungshilong azüngja liasü, pai state sorkar takoktem aser 2021 küm Himanta Biswa Sarma CM akümba sülen scheme aser policy balala benokba indang lemsatepa liasü.

Shah-i anogo ana atema northeast semdangogo aser iba mapang pai Hombarnü Arunachal Pradesh kübok Kibithoo tesem semdang aser arrtsü nung aliba yimtsüngtem terenlok asoshi Vibrant Village Programme amenokja liasü.

Kibithoo ya Arunachal Pradesh kübok Line of Actual Control (LAC) anasa yimtsüng mezüngbuba lir.

China-i Arunachal nung tesem 11 nungja melentsüba sülen anogo ishika lir Shah-i iba state semdanga liasü. China-i item tesemtem nungja melentsüba ajanga linük ana tsünga tesendaktep tamajungba kümshio, koba 2020 küm May ita nungi kanga mejungi kümer liasü.



Ranchi nung Jharkhand CM Hemant Soren anema longkak aitba mapang police temi water cannon amshia BJP kübok inyakertem mintokba noksa nung angur.



## TIR YIMYIM YIMOBILEM (EDITORIAL)

DIMAPUR RASEMNÜ, RONGCHII (APRIL) 12, 2023

### Covid-19 mamatsüla

**A**senoki asen temang nung tashidak wara agi metongra kanga süoki iabo mebilemer, anungji kecha balaka shisabolua melii zübazübaa aliba purtemji asenok lir. Atangji, lendong agi meketbanga aliyonga shisamebulii alibaji junger saka mekümdangi lira tanü putu nung adokba tashidak tasen-tasen Covid-19 wara ama agi melamelaa menepadoktsü aser iba ama wara agi meneperbo petdoktsü tasak asütsü. Asenok ajaki Covid-19 agi amokmerenba mapang ajangshio go aser asenok nisung shiai Covid mapang ajangshiba tejashitsü, tesasatsü aser ano temenüntsü otsü ka mesüra kabo bona lir. Atangji, Covid tashidak agi aseni meimbatem aika asenok nungi bener ogo, itemji tesasatsüka aser tejashitsüka lir. Mekümdangra, kasaji asenok dak ataloktsü kecha menua maka. Tanü India nung Covid-19 wara ano tali tali pokteta aoba osang asenoki angashir. Ano, lendong kaji tangbo tanurtem dak temelaba atonger. Item tanurtemji temang metaa shirang tenzüker, aketer aser tenük meremmerema küma menoker. Iba ama tashidak wara nungi kümzüksü asoshi teinyaktsü tongtibang ana lir, kaji nisung shiai Covid-19 wara nungi jenbua alitsü asoshi government-i tetuyuba agütsüba ajak shitak benshitsüla aser ano teinyaktsü kaji government-i shirangertem yaridak mozü kitem ajak shitak renema atatsüla. Iba tangatetba nung Union Health minister tetuyuba nung state ajak nung health minister-temi anir pei pei state nung Covid wara anema raratsü asoshi renemba mapatem repranga mozü kitem sema yakanü o yashi na jajaogo. Aji oda, Nagaland nunga tanga state-tem nung amaji medical minister-i anir mozü ki nung inyaker ajak Covid wara den raratsü asoshi shitak renemdar asütsü imlar. Covid-19 ama wara den raratsü renemtsüba yabo mozü ki tulu tila ta mali, ajak pei yari shitak renemer atatsüla. Asenok dak tashi mait kaji, lendong matalok tashi ketdangsertemia terenemtsüka zep ta renemer matar aser nübortemia kecha süoki ia mebilemer. Ashi, nübortemi danga, tia mejungika ni shirangadok nunga ni ayipdak aser anepaludak mozü ki shitak renema ali-mali ta metetnüa mozü kitem repranga jajara, iba jagi government-i asenok atema lapoktsüba mozü kiji teti asoshi jungadoktsü aser wara agi menepaka junga anepaludak akaba agi kümzüksü. Covid—19 ama tashidak wara ya zübazüba bilemstüba wara masü aser tanü putu agi ojangji, ano Covid dang nungi tesashiba wara ka khen, ka khen ta poktetyonga aotsü, anungji asen anasa asenok atema lapoktsüba government mozü ki yabo asen kija mozü ki ama bilema asenoki dena tebang ia aser tenla dena agüja anepalutsüla. Covid-19 ama wara nungbo takar tulur asüyonga private mozü kidangi aotsü nung ta masü, kechiyong aikati sen agi matutsü aser oda odabo yipten agia matatsü. Tanü tashi asenok nübortem yabo mozü chidaktsür suwar kümdaktsü ama asenok shirangba mapang sen meindoki teyari angudak government mozü ki lapokja liaka, asenoki ibaji asenok asoshi lapoktsü amai bilemer saka private mozü kitemjiang asenok atema lapok amai bilemer. Iba jagi government mozü ki aika kibur maliba mozü ki amai akümer aser asenok aika private mozü kidangia moutet süa adoker. Aji oda, doctor asem pezü alitsüba mozü kitem nung to anarongdena doctor ka dang alir aser tanüngbajibo Kohima aser Dimapur nung dang liteper. Iba amaji doctor-tem rongnunga pei asoshi dang bilemba mapatem mazüoktetra, asenoki tashidak waraa mazüoktettsü. Government doctortem aika pei private mozü ki lir, aser Covid-19 ama tashidak wara agi atongdangbo government mozü kidang amang sangwa methitemi 'overtime' inyaktsüsa akümtsü, idangji pei meyong private hospital bilemstü asü, government mozü kidang alir yaria amungtsü? Item ajakji ano khen government nung temzüng ozüng yanglurtemi bilemdanga asen lima tashidak lendong tulu agi memenepdang government mozü kidang nungdak aser government doctor-tem teinyaktsütem bentetbenteta renema atatsüla.

## OLEMSABANG

### TSÜNGREM PANG NUNGI ADOKBA O SHIA AGI ALITSÜ

Süpongñügsang Longkümer, Darogapathar Dimapur

Tsüngrem taochi tulu ali nung temulung meyiptsüpur asoshi pai odang atarsar Meimchirtem timbaka bei amangnüsü amanga küm meyrjangsa meyrjangsa süitemer. Saka meyimchir ajak Tsüngrempang nungi adokba o shia tang agi alir ta lemsatepnüa Tsüngrem dang sarasatema asüngtanger zülur. Ocet azünger shia tangi tamasa Yisu temeim salem.

Khrista dak amanger asoshi kanga tongtipang o long. Mezüng Adam tang atsü nung aliba süngjang ajak nai chitet, saka Tsüngremi ozüng agüja ashi, tajung tamajung metetba süngtong nungi nai machitsüla nai aji chira na asütsü Lipok 2: 16-17 Peri (Mojingi) Lai ajak meteta ali nung iba Lai nungi Adam atitanga asüngtang saka kecha nungnanga mali odang achi nung alima meimchirtem tatem maka temenen atema Süngjang yong ayok. mojingi tanü tensa nunga Laishiba nungi atitangra aika tsüktsü. Tanapuba Adam, Lirnü aser Lir aonung kanga yarongdaktsür külen Mojingi Laishiba oTsü Tazü 8: 3 nungi Yisu atitanga asüngtang, Na Tsüngrem chir süra item long agi amtsük kümdakjang? Yisui Laishiba kasa taputem nungi Mojing tang langzüba angur, nisungi amtesa agi taküm malir saka Tsüngrem pang nungi adokba o shia agi taküm alir. (Per ama tesangra Posü ama tongmelang) Math 4: 4, Tanapen Mojingi Pa temeshi yimti-I anir atu aser tenlaki kilem kolak nung mendaktsür Yisu dang asüngtang? Na Tsüngrem chir süra, nü sasa tsükang, kechaser yamai zülua lir na atema Tsüngremi bei tenyartem dang melatsü, aser nü tsüng long ka nunga memetsüdaktsütsüsa parnok kapu nung na ajongzüktsü, Yisui Mojing tang ashi Ano ya zülua lir, Nai kibuba nü Tsüngrem tatitang. T ken 91 :11,12 nungi atitang.

Alima ajak bei Government yimsüsüba kübok tashi anga alir, saka nisung tamajunger ta masü saka tamangba tsütsü tashi mangatsüla kar lir. kechi ozügsa yanglutir tashi mangartem temerenshi latetta lir. Saka tashi angatsü ozüng kar lir tashi mangatsüla ozüng, tamang agi nokdaktsüla kar lir. Mezuram nungeri Amit Shaha dak wako tanak aploktsüba ama tasü eita nokdaktsüla kar lir Khristmas anügo ama, Pam Sunday, Good Friday, Ester Sunday aser Temeshi anügo amongnü ama nung tekülemi modaktsütsüsa sentong yangluaka manidaktsü tasü aitsüla. Iba ama sentong nungpo amangbapuritiesü eita sarasatemtsüla. Eljai taküm Tsüngrem tenüng nung Baal ainketertem kishon ayong nung ajak tepsetba ama. khristantemi yamaji tepsetang ta masü saka tamang agi temenen tongpang koktettsüla temenen dang tashi mangatsü mapang tongago. Bjp sentong nung tanemi tanemi Naga lima khrista asoshi raksatsütsü, Bendangertemi Nagaland hotel nung yi mangura ta ashiba tajungba asü, Naga lima khrista asoshi ta saka Yi talupusa angur ta ashiba tajungba? Naga lima rongsen asoshi ayoktsü asükhrista ulutsütsü? Otsüla oboula nungertemi Yisu tenüng nung meranga amanga penshiti meranga penshiti ta ken tena amanga Naga lima ajak amangsepdaktsü, saka tanü Per tasa nung Naga lima ya tamakok angutsüsa lenmang ajak nung nokdaka lir. 1 Khrista lima agi yi lima, 2 Tsürapor azü agi alangzükba temeden, 3 Naga lima rangpen ka aliba ana küma lemdangtsü sentong sang nung shealir, Naga lima tuluba len atema lenmang foot hil road nung temulung magütsüra iba litsü nung aliba MLAtem koba atema nokdaker? Koda masüba densa atema iba lenmang kanga tongtipang, Chief mimisterba tebilemba kech? Lanurtem, yimden atema jembiba ya temenen masüagotemulungjangji arakzüangma. ya- a yimden rongnung tongtipang ka lir ta memetetra nüpurtemia sen atema MLAJi adoktsür asü yimden inyakdaktsünür adoktsür? Iba lenmang dak rongsen ajak sendaka lir ta ayongzüker. Tsüngrem o agi Mojingi tasempenpuba Yisu atitanger Tana Mojingi pa tenem kanga talangkati anir atu, aser aser alima yimlitem ajak aser item sentsüwangshi sayu aser mojingi Yisu dang asingtang, Nai apudaker ni külemra item ajak nü nem agütsütsüt, Yisui mojing dang ashi Satan, yang nungi oadokang; kechaser ya zülua lir, "Nai kibuba nü Tsünnngrem külemang aser paji tang tenzükgang Tazü 6: 13.16. Per ama tesangra aser Pos ama tongmelang alitsü asoshi Yisui Math tapu 4 :1-11 Lai o tem agi mojing tang langzüba pa dak amangertem dang sayua lir. Tanü Naga lima yimsüsüba menden Satani amokbanga lir. Anungji tamang agi Yimsüsürtem kümzüksü aser Satan temesüzükba nungi kImzükgang ta sarasatemi taarogopur ajak dang ayongzüker. Tsüngremi moajang Amen.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# 'His Only Son' movie-i sen million \$11 bendena lir



**Rongchii/April 11, 2023**

**(Agencies):** Hopta ana atonga Angel Studio indang mezüngbuba theatrical movie ka sen aazükba tsütsü temaba jenjang atongtsü takzüteta lir.

Tamang dak ajemdaker sen \$250,000 agi yangluba His Only Son movie ya nüburtemi sapoa repringteper. Easter hopta tatem tashinung iba film repringer longsoa akumba ajanga box office nung sen \$11,044,046.84 tashi bendena lir.

Iba movie ya Laishiba nung aliba ama aser tejangja lir, koba March 31 nü Angel Studios ajanga saya, aser iba streaming platform nungi tamangba yimsü dak ajemdaker nüburtemi sen bendena yangluba The Chosen takok ngua arutagi.

His Only Son atema Angel Studio indang crowdfunding maongka nung ajemdaker sen indoker meyrirjang aikati iba movie nung sen indoka movie ya yanglu.

Iba film ya sen kangabo meindoki yanglua studio film tulutem den tokteper aser tang tashi mamangteti sen bendener, ta Angel Studios nung Global Distribution indang senior vice president Jared Geesey-i ashi.

"Terepringertem ya iba industry tarutsü nükla ta amanger aser parnok dak tamang akar," ta pai ashi.

His Only Son ya Laishiba nung shia aliba otzü nungi agiteta yangluba lir, kong Tsüngremi Abraham dang Moriah tenem nung par jabaso Isaac takum tenlatsü asüngdanga liasü.

Motion picture ajanga Abraham (Nicolas Mouawad), par jabaso aser par kilir ana iba tenem kolak bushia asemnü jajaba indang sayur. Parnok tenemi atundang parnoki lendong-timtem aser tatidang balala ajurur aser iba mapang Abraham aser pa kinungtsü Sarah (Sara Sayed) na dang Tsüngremi temeshi tesem nung bendanga tenla agütsütsü alisang maotsütsü nangzükba pai bilemteter.

Akhi mapang nungi Tsügremiti kechiba iba ama bendanga agütsüba aginer, ta akhi mapang nungi asüngdangbatem telanzüba agüja iba movie ya yanglu. His Only Son yagi Tsüngrem den meimchi tesendaktep tali jangja sayur aser terepringertem dang temolung nung 'Nü dang ajak agütsütsü asüngdang dang nü tamangi aji koktetsü asü" ta tasüngdanga ka arur.

Iba movie ya 'A' Cinema Score audience rating, Rotten Tomatoes critics score shilem 80 aser audience score shilem 96 ngua lir.

Iba den külemi movie repringer alirtemi dangar nema

Angel Studios' "pay it forward" system ajanga His Only Son repringdaksütsü asoshi ticket 24,000 alia agütsü, ta studio ajanga ashir.

Angel Studios yagi taoba mapanga takok tulu anguba The Chosen, Dry Bar Comedy, aser The Wingfeather Saga movie tem yanglua lir.

The Chosen ya Yisu Khrista takum otsü season aika aliba TV series mezüngbuba lir, aser ibai company ajanga inyakba project tem rongnung alima nung nisung million noklang aikati repringba mezüngbuba project alitsü.

The Chosen ya season tenet yanglutsü sentong lir aser tang Texas nung season pezü buba tangokba mapang lir.

His Only Son ya mesayadang February 24 nung Angel Studio ajanga tamang nung ajemdaker yangluba Jesus Revolution saya aser iba film ya takok tulu anguba mapang lir. Iba film yagi 1970s mapang Jesus Movement indang otsü chichiba ashir.

Jesus Revolution nung tongti shilem agir Kelsey Grammer aser Jonathan Roumie (Yisu shilem agisang) nunger ya Angel Studios indang The Chosen nunga tongti shilem agir. April 10 tashinung iba movie yagi box office nung sen million \$51.7 dak tema bendener liasü.

## ANOGO ABEN TSÜNGREM DEN

### Tashi aser tobur tajung (T.Ken 96: 1-6)

Sorak tezü terepringtsü tobur tajung, saka ibai tashi mait. Mapang tatsü ka nung ibaji samadoker.

Oset kar tobur tajung lir saka tashi mait. Aser oset kar tashi tait saka tobur tamajung lir. Lungpak telungtet kaji takang lir, saka ibaji nai na mejangba taktang nungbo meyunütsü. Kasaji, merang tongshi kaji tangutsü atema masü saka yaritsü atema ayur. Tekülemdak süki nung tobur tajung ka liasü. "Konang aser tamarenba Pa tsüngdang lir: Tekülemdakji tashi itta aser tobur junga lir" (t.6). Tekülemdakji süki ka liasü- ibaji tobur tajung saka tashi mait liasü. Tekülemdakji tashi aser tobur tajung anapronglaji akatsüla.

Asen Tsüngremji mapa agi sayuba Tsüngrem, saka Pai tobur tajungji mesendoker. Pai yangluba nem tashi aser tobur tajung agütsür, süngdongtem, tenemtem aser ayongtem. Ajakji tashi tait aser tobur tajung lir.

Tsüngremi asenoka tobur tajung südaktsüner. Pai asenok tashi tait aser tobur tajung südaktsüner. Asenoki temeshi tobur tajung nung Kibuba külemtsü akok kechiaser tashi aser tobur tajung Pa külemdak lir.

Tsüngremer mapatem nung tobur tajung aser tashi lir. Nai Pa den telungjem nung jajara ne taküm nung tobur tajung tashi alitsü. Na tali, tali Yisu mesüka alitsü.

## Seminary College nungi Blac Chyna doctorate angu



**Rongchii/April 11, 2023**

**(Agencies):** Blac Chyna, shiba tawa nungi la asodang jatsüba tenüng, Angela White amshir, lai January ita Doctorate nguogo ta ashi.

Arishi küm 34 tain White yagi Hombarnü Instagram nung Sacramento Theological Seminary and Bible College nungi la Liberal Arts degree anguba indang noksa ka lemsatepa liasü.

"January 17, 2023 nü Sacramento Theological Seminary and Bible College nungi ni Doctorate of Liberal Arts angu. Doctor Angela Renee White," ta lai noksa nung zülutsü.

White takum melenshiyonga aruba lenmang nung ibai tesüsaba temai adokbaji lir, aser lai taoba hopta sangdong ka nung la baptiogo ta shia liasü. Ano la temang

nung cosmetic procedure kar melenshiba otsüa lemsatepa liasü aser item rongnung 'breast and butt reduction surgery' agiba aser la indang tejak nung mozü amshia aliba samadaksüba densema lir.

"Ni shiranga aliba aser anibelega aliba agi lakogo. Kü takum shidak meliasü aser ni tamajung dang benden. Kü takum nükjidong ya kechi? Ni iba lima nung kechi asür? Itemji ni tali metetnüa akum aser ni ngutet," ta lai tawa shia liasü.

"Industry nung mapang talangka aliba ajanga nüsasa na samatsü. Anungji ni takum melenshir tetsür aser tembar tajung ka kumnü, tanüla tsütsü tali tashi itshinü aser ni chichiba nüburtem dang sayunü."

Tyga tena jabaso King aser Rob Kardashian tena jala Dream nati la takum melenshitsü ajungmeso, ta ashi.



Dimapur nung Easter anogo tekülem ki ka kima Easter Eggs tebour junga yanglur yua aliba nüburtemi repringba noksa nung angur.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Pokshinangshi**

(adj) talitapong chiyongba (overeating)

\* **Pokshinangshia** chiyongbaji temang atema majung.

**Poksüng**

(adv) teboka sünga chiyong, pei peri angu (handy to mouth)

\* Asenek aika pei **poksüng** ngura pelashishia alirtem lir.

**OLONG PAITEP # 6484**

1		2		3		4	5			
				6						7
		8								
9				10		11				
			12						13	
						14				
16						17				

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_ \_ \_ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong talemangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)


**OLONG PAITEP # 6483 TELANGZÜBA**

**TIPIEN :**

- 2. Bangsemo, 6. Tiptem, 8. Jen,
- 9. Talilla, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

**LANGTSÜNGLEN :**

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.



**YIMDAKLIRTEM RATASETER :**

**Alokba** : Temba, tanü asüng ya Apuzüsen maliba sorkar apuzüsen maliba sorkar tasa jembiba ya kechila ajai.

**Sobangba** : Wa, apuzüa inyaker ang sen angur südi? Saka tang aliba yimsüsürtem yagi mapuzüi mela melaa anguba sen ang agitsü atema "Apuzüsen maliba sorkar" ta ajar halaba.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**

- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Minister Ashok Singhal-i engineer ka mapa nungi anentsü**



**Guwahati, April 11, 2023**

(Agencies): Guwahati Development Department Minister Ashok Singhal-i Mongulbarnü Guwahati nung Bahini ayong merüktetba mapa semdanga senzü.

Assam sorkari Guwahati nung Bahini aser Bharalu rivers merüktetsü atema mapa tenzük kechiyong kümshia tzümetsüng ajanga timtem ajurur.

Minister Singhal-i mapa inyakba reprangdanga senzüdang mapa meilongi

inyakba atema mepelai in-charge engineer ka mapa nungi anentsüogo.

"Tzüngluruwa matongdang Guwahati nung kümshia tzümetsüng timtem ajuruba timtem agientsüla" ta Assam minister Ashok Singhal-i ashi.

"Ni GMC aser H&UA department nungi ketdangsürtem den mapa inyakba repranga senzüogo" ta pai ashi.

Guwahati ajanga ayimba ayong ana ya "Mission Flood Free Guwahati" initiative kübok

merükteter.

"Guwahati nung Zoo, Lakshminagar, Nayanpur, Japorigog, Hengerabari Rukminigaon, Pibco Point aser tanga tesemtem nung Bahini ayong anasa tesemtem atsünga agiba reprangdangogo" ta minister Ashok Singhal-isa ashi.

Bahini ayongküm anasa ozüng alema mapa inyakba kar reprangdangogo. Item mapa inyaksü temelaba agütsüba ketdangsürtem merenshitsü, ta paisa shisem.

**APPSC paper temai adokertem putettsü: Kiren Rijiju**

**Itanagar, April 11, 2023**

( Agencies ) : Bushisüngdangertemi APPSC paper temai adokdaksürtem putettsü imlar ta Union Law Minister Kiren Rijiju-i ashi.

Iba ya kanga dang süoki aitsüba inyakyim ka lir ta Minister Rijiju-i ashi.

"Arunachal Pradesh Public Service Commission (APPSC) paper temai adokba maparen ya

kanga tulu. Ajisüaka sorkar aser investigative agency ajanga aibelenertem putettsü" ta pai ashi.

"Ibala khuret ya mapang talang agiang kokteter. Iba nung nisung aika shilem lir. Aibelenertem merenshitsüla ajisüaka kasa mapang nung tai maketertem nem timtem magütsütsüla" ta Rijiju-isa ashi.

Paper temai adokba ajanga

kaketshir aika timtem ajuruogo ajisüaka bushisüngdang tembangtsü. Nisung kari temulung magütsüba ajanga kaketshir aika timtemdaksüba atema sasar, ta paisa metetdaksü.

Arunachal Pradesh nung lungkak aitba sülen taküm March ita cabinet-i APPSC Chairman aser Members tasen shimba meyipa agitsü tetuyuba agütsü.

**North East Express nung passenger ka khaset**

**Guwahati, April 11, 2023**

(Agencies): New Delhi-i aoba North East Express train nung passenger kati pa sasa khaset.

West Bengal nung New Jalpaiguri Station anasa iba lendong atalok ta Northeast Frontier Railway (NFR) otongdar kati ashi.

"Iba nisung indang maitsü

ano mejangja lir. Hombar aonung 8:00 ako meta general compartment nung iba lendong atalok" ta NFR spokesperson Sabyasachi Dey-i ashi.

"Pa ket nung ticket mesüra pa indang kulikaket kecha maliasü. Onoki pa indang maitsü jangjatsü merangdar" ta Dey-isa ashi.

Iba lendong atalokba sülen forensic investigation ka tenzükogo aser iba nisung ya koba tesem nungi train nung amen'ar mejangjateter, ta paisa metetdaksü.

North East Express ya Guwahati nung Kamakhya nungi New Delhi nung Anand Vihar Terminal tsünga senzür.



Mongulbarnü Minister of State, Ministry of Development of North Eastern Region (DoNER) B L Verma-i Lengpui Airport nung mapa inyakba repranga senzüdang agiba noksa angur. 'North East Special Infrastructure Development Schemes (NESIDS) kübok Rs. 19.59 crores endoka 'Improvement/Upgradation of Operational/Non-Operational facilities of Lengpui Aiport' mapatong inyaker. Tanü B L Verma-i Mizoram sorkar kübok PWD & Aviation Wing, GAD ketdangsürtem den külemi mapa inyakba reprangdanga senzüa liasü. (Agartala, April 11)

**GOVERNMENT OF NAGALAND  
DIRECTORATE OF SCHOOL EDUCATION  
NAGALAND: KOHIMA  
ADVERTISEMENT**

*Dated Kohima the 5th April 2023*

NO. ED/EST-1/APPT/TBP/2015-16:: In pursuance to Government Letter NO. DSE/PER-80/2015/879 dated 16th March 2023, applications in the prescribed format are hereby invited from regular State Cadre Sr. Graduate Teachers with B.Ed having completed at least 7 years of service as Sr. Graduate Teacher to be deputed as Assistant Language Officer from employees belonging to the under mentioned Tribes. The duly filled in application forms may be submitted at Room No 512 of the Directorate of School Education, Nagaland on or before 21.04.2023.

The application form may be downloaded from the Department's Online Services Portal <https://dosenl.in>

Sl. No	Name of the Tribe	Number of Post
1	Angami	1
2	Chang	1
3	Khiamniungan	1
4	Kuki	1
5	Pochury	1
6	Rengma	1
7	Sangtam	1
8	Yimkhung	1
9	Zeliang	1

**(THAVASEELAN K) IAS  
Principal Director**

Office of the  
**Molungyimsen Laishir Telongjem**  
Nükjidong - "Khrista Puküm"  
P.O. Tuli, Mokochung, Nagaland - 798618

**TENÜNGSANG AGÜTSÜR**

Molungyimsen Laishir rongnungi Dr.J. Meren Tzüdir-i New Life College Bangalore nungi Doctor of Ministry (D.Min) Thesis title : "Towards Development a Relevant Pastoral Care Response to the Alcoholic Among the Ao-Naga Youth (18 - 25 years) in Dimapur, Nagaland to Enhance wholeness", ngutetba asoshi laishirtemi tenüngsang agütsür.



Tsüngremi nü taküm aser kibong Pa wadang asoshi tali moajang ta sarasademtsür.

**Sd/-  
P. Anungla Sanglir  
Secretary, MLT.**

**TENÜNGSANG AGÜTSÜR**

Wb. Dr. M. Chuba Ao, tetemjen lenir MARCOFED (Chairman) ketdangsütsü shimtetba atema asen lenir Chief Minister Wb. Neiphu Rio aser pa den külem tenzüker ajak dang kangasa pelaba Ungma Imlang Imsongunger IMTISUSANG SEMCHIR ajak tenüng nung tenüngsang aser tetushi tulu agütsür.

Teyanglur Tsüngremi lenir nübur tenzüka wadang nung maneni len ania moajangma.

*Imtisusang Semchir Tenüng nung;*

1. Alemtoshi Imsong, Tatar
2. Alingangshi Imsong, Tatar
3. Imnapokym Imsong, Tatar
4. Mayangnüken Imsong, Tatar
5. Temjenchuba Imsong, G.B

**Myanmar military-i jila ka amak; nisung aika tepset, aika yiru**

**Yangon, Rongchii/April 11 (Agencies):** Myanmar military-i tayimtsü amshia linük teyong nung aliba jila ka makogo, koba military anema nokdakertem tamendakdak ama züngshir.

Tenük kuli agütsürtem aser local media osang balala ajanga ashiba agi, Mongolbarnü iba jila amakba sülen nisung aika süogo aser aika yiruogo, koba military-i linük amokbangba sülen lendong tamajungtiba ka lir.

Sagaing temeket nung alirtemi ashiba agi, military-i Pazigyi jila amakba sülen tanur densema nisung 50 shi tepsetogo. Iba jila ya Yangon yimti nungi kilometer 110 shi pila lir.

Administrative office ka lapoktsü atema nüburtem adenshir aliba mapang military-i anüing ajanga iba jila maka liasü, ta Al Jazeera osangbener Tony Cheng-i Thailand yimtiba Bangkok nungi metetdaktsü.

"Anepdang 7:35 ako nung nüburtem ya jet fighter temi amak aser iba sülen Mi-35 helicopter temi maka liasü," ta lendong nungi jenbor kati ashiba Cheng-i metetdakja liasü.

"Paisa nisung 40 asübabo jangjatsüogo, saka ano asür aika akümtsü ta bilemba lemstepogo.. Iba tesem kanga mejungi raksaogo. Osang angazükba ajaki ashiba agi, item nüburtem ya civilian tem liasü aser military-i amaktsü asoshi kecha nungdak mali," ta paisa ashi.

Iba tatalokba dak sendakba nung Myanmar military yimsüsürtemi tang tashi nung kecha osang agüja mali.

Jila mezüngbuba amakba sülen tekümsükertem parnok maparen balala benoka inyaka aliba mapang tanaben amak aser tekümsükertem asem tashi tepseta liasü, ta Cheng-i ashi.

Military-i sorkar atsüngba anema nokdakertem azüoktsü merangba mapang military-i kecha taochi makai civilian tem tepsetba atema parnok aija arudar.

Taoba ita Myanmar military lenir Min Aung Hlaing-i, pa yimsüsüba anema nokdakertem taochi makai samatsütsü tenangzüka agüja liasü.

Local People's Defence Force (PDF) züngsem kati Reuters news agency dang ashiba agi, parnok indang local office lapokba sentong ka agia aliba mapang fighter jets temi injang khalokja liasü. PDF ya anti-junta militia telok ka lir.

"Tang tashi nung nisung kwi asü iba indang osang tejangja memetet. Tasü mang ajakbo monguteti lir," ta PDF züngsem yagisa ashi.

Myanmar indang pro-democracy government; National Unity Government-i nüburtem amakba aitsüogo aser ashiba agi, iba tatalokba ya military-i civilian tem dak taochi makai tashiyim amshiba tatishitsü rongnung ka lir.

Taoba küm October ita jet fighter amshia kentenba sentong ka maka civilian, local

kentener, aser Kachin state nung telungpur telok ka nungi züngsem 50 tepsetba sülen Mongolbarnü iba jila amakba ya lendong ajak rongnung tamajungtiba ka asütsü.

2021 küm February 1 nü military-i, Aung San Suu Kyi-i aniba sorkar atsüngtokba sülen nüburtemi yimjung nung longkak ait tenzü, ajisüaka military-i tashiyim amshia nüburtem azüok tenzüka sülen tensa kanga mejungi aküm. United Nations experts aser tangartemi iba tensa ya civil war ka shiogo.

Military-i artillery aser tayimtsü amshia tesem balala amakba sülen nisung million ka dak tema pei talidak ki toktsür jenshiaogo.

Sorkar atsüngba sülen anüolen aliba linüktemi general tem nem tenokdangba balala agütsüogo, ajita asünungdang parnok rongsen azüoktettsü aser Russia amala supplier tem nungi military hadir balala belener aruba azüoktettsü.

Military otongdar kati Al Jazeera dang tawa ashiba agi, taoba mapang tesem balala amakba koba parnok dak tai tongloktsüogo, iba ya osang tai lir.

**Taiwan Tir Tsai Ing-wen-i China military exercise aitsü**

**Taipei, Rongchii/April 11 (Agencies):** China-i asemnü tashi Taiwan temeket nung military exercise agiba iba asetkong linük Tir Tsai Ing-wen-i aitsü aser parnok ya shisa maka aser region atema timtem lir, ta ashi.

Nisung million 23 aliba asetkong, Taiwan nung amaker ama war games ka Beijing-i tenzüka April 10 nü tembang aser Taiwan müketa aliba tzü nung China nunger rong ti Mongulbarnep tashi liasü, ta Taiwan indang Ministry of National Defense ajanga ashi.

Tsai-i Central America semdang kidangi meyiba shilangba sülen drills ya tenzüka liasü. Lai Central America semdangi aodang aser meyipa arudang United States nung anaben anen aser US House of Representatives indang Speaker Kevin McCarthy den senden ka mena liasü.

China nungeri Tsai ya 'separatist' ama züngshir aser

tembar linüktem semdangba ya akhi mapang nungi amshia aruba yimya ka aser Taiwan nüburi imlaba ama lir, ta lai ashir. "China-i ibaji amshia military exercise tenzüka Taiwan aser region nung tensa mejungi kumdaktsü. Region nung linük tuluka atema ibai yimya tajung masü," ta lai Hombar aonung la indang Facebook page nung zülua liasü.

Beijing-i Taiwan ya China indang shilem ka ama züngshir aser iba asetkong agitsü atema tashiyim mamshitsü ta shia mali. Tang tesüsa drills agiba nung Taiwan amaker ama aser tayimtsü ter dak temai "aerial blockade" yimya amshia liasü.

Iba exercise nung mitkar kongsang balala kübok alirtem ka kuma lungjemer raratsü tashi tendanga liasü," ta China indang People's Liberation Army indang Eastern Command sangdong ka ajanga ashi.

**(Maneni tapak 8 nung...)**



Good Friday Agreement anemer Republican temi Londonderry, Northern Ireland nung yimdong süa jajadak shilem agiba noksa nung angur. Ireland nung British nunger yimsüsüba anema Nationalist temi nok-nü amer nokdakba 1916 Easter Rising bilemteta Irish Republican tem adenshia liasü. Northern Ireland nung küm aika tsükchitap adoka aliba anentsü asoshi Good Friday Agreement ya zülutepa liasü. Iba mapang mask inoka aliba lanurtemi police gari nung petrol bomb poklokja liasü.

## Mkg Inter-ward football asayamung 2023 osang



April 11 nü Sangtemla vs Yimyu na Imkongmeren Sports Complex, Mokochung nung 4th Mokochung Town Inter-Ward Football Tournament asayaba mapang tangokba noksa nung angur. Mokochung, 11th April, 2023.

**Mokochung, Rongchii/ April (TYO):** April 10 nungi tenzüka Imkongmeren Sports Complex, Mokochung nung 4 buba Mokochung Town Inter-Ward Football Tournament 2023 asayadar. Taküm iba asayamung nung Mokochung town kübok ward 13-i shilem agitsü renema lir.

Tanü April 11 nü mezüing asaya Lijaba Lijen Ward o Majakong Ward tsüingda asayaba, Majakong-i Lijaba madak goal 1-0 agi takok angu. Takokba goal kaji Majakong nungi Jersey No. 17. Watitemsu-i mezüing asaya tesadang minute 14 or lia

idaktsü.

Tanabuba asaya Sangtemla Ward aser Yimyu Ward na asayaba, Sangtemla-i goal 4-0 agi Yimyu pur madak takok tulu angu. Mezüing asaya tesadang nung Sangtemla-i goal 3 agütsü aser item goal temji; Jersey No. 11. Opangtemjen-i minute 25 aser 30 nung goal kaka yok aser 1st half tatemtsü lia mapang apuloktsüba 30+1 nung Jersey No. 10. Meyasenba-i goal ka idaktsü.

Asayartem anisüngzük agir külen, telok anaprongi kanga meranga asaya arur joko tanabuba asaya tesadang tatemtsü minute 60 nung Jersey

No 10. Meyasenba-i goal ka idaktsüli referee-i asaya tembang whistle apuloktsü.

Iba asayamung marok shir ward-i bendir parnok nem senpet sen 50,000/-, atongba (runner up) nem 30,000/- senpettsüsü aser nija seneprema kar agütsüsü, tayongertem terenemba lir.

### 12th April, 2023 asava

#### yamai alitsü:

Mongsenbai Ward Vs Marepkong Ward @ 12:00 noon  
Dilong Ward Vs Alempang Ward @ 1:30 PM  
Penli Ward Vs Artang Ward @ 3:00 PM

## Wrestler tem bushisüngdang osang sangdongtsü akhanger

**New Delhi, Rongchii/April 11 (Agencies):** Wrestling Federation of India (WFI) tir Brij Bhushan Sharan Singh aser tangartem anema sexual harassment ken o benokba dak sendakba nung Oversight Committee-i bushisüngdangba osang Union Sports Ministry-i tang tashi mesangdongi aliba mapang ka nung federation-i Gonda, Uttar Pradesh nung asayamung ayongzüka asayatsü sangdongogo aser May ita election agitsü atema renemshidar.

Iba ajanga longkak aita aliba wrestler tem akosadaktsüogo, shirnoki ministry aitsüogo aser bushisüngdang ya ochi obendang agütsüsü asoshi asü masü mejangjai kumogo, ta ashi.

Osang ajanga, WFI units 28 senden ka April 16 nungi 18 tashi U-17 national championships aser Senior Open National Ranking Wrestling Tournament asayaba mapang Gonda kübok Nandini Nagar nung amentsü, ta angazükogo. Iba tesem ya Singh kanga tashi ita aliba tesem ka aser WFI ketdangsurtemi ashiba agi pa lenisüba nung iba senden amentsü akok.

Singh-i tir mapa term asembuba benogo aser National Sports Code provisions kübok pa maneni tokteptsü atema temsüa mali. Pa indang tenure iba ita tembangtsü. WFI ketdangsur kati ashiba agi, WFI-i New Delhi nung May ita tanabuba hopta election agitsü sentong yanglular.

"Sorkar tetuyuba dak ajemdaker AGM ya 2022 küm January ita agitsü aliba athi. Onoki tang iba senden ayongzüka amentsü kechiyong election densema tanga onük tongtibang agika sensak asemtsü lir," ta WFI ketdangsur kati ashi.

Singh lenisüba nung senden ametsü asü ta asüngdangba mapang ketdangsur yagi, "kechiba mamentsü? Pa dang ken o bushisüngdang masü tashi atsüingina atang ta ashi aser yamaji pai inyakogo. Iba ken o dak sendakba nung onoki legal jenjang agitsü. Pa medentetra senior vice-president lenisüba nung agitsü," ta paisa ashi.

MC Mary Kom-i anir Oversight Committee-i parnok indang report April mezüingbuba hopta agütsüogo, ajisüaka ministry-i kecha osang

magütsü. Hombarnü sports ministry dang ken o ashishi saka kecha telangzüba magütsü.

Linük nung wrestler temi sexual harassment ken o dak sendakba nung Brij Bhushan aser WFI ketdangsur kar aija longkak aitba sülen iba telok tentetja liasü. Iba telok nem ken o bushisüngdangtsü atema hopta pezü agütsü aser WFI inyakim achaayangtsü nogloksü.

Tokyo Olympic medallist Bajrang Punia shiba longkak aiba wrestler tem rongnung densema lir pa den Vinesh Phogat, Sakshi Malik, Ravi Dahiya aser Deepak Punia nung ajaki WFI ketdangsurtem akhi ama pei mapa agizüka inyakba ngua aoksaba lemsatepogo.

"Committee report-a mesangdong sürnung kodaser WFI inyaksangshi tenzüker?" ta Punia-i asüngdang. "Osang ajanga ashiba agi committee züngsem katibo ken o ashishiogo. Anungji kecha ataloker aji onoki mejangja. Onoki wrestler tem tim metemdaktsüner. Iba ya ken o tongtibang ka lir, ajita mesüra onoki longkak aitba sentong ayongzüka magila. Onoki ochi obendang aginer," ta pai ashi.

## Priyanshu Rajawat jenjang 38buba tongtetogo


**New Delhi, Rongchii/April 11 (Agencies):** India nung lanur asayar Priyanshu Rajawat shibai Orleans Masters Super 300 tourney kokogo, pa Mongolbarnü sayaba BWF rankings nung jenjang 20 tejakdangi tua tang 38buba nung lir.

Arishi küm 21 tain asayar yagi final asaya nung Denmark nung asayar Magnus Johanssen 21-15, 19-21, 21-16 agi koka mezüingbuba Super 300 title ka aben aser ranking points kar nguteta liasü.

Pai tang tashi nung point 30,786 nguteta lir aser pa India nung tebur kija asayartem rongnung pezüububa nung lir.

India nung tebur kija asayartem rongnung HS Prannoy maneni jenjang tajungba nung lir aser pa dang 8buba nung lir.

Commonwealth Games champion Lakshya Sen shiba tang anisüngzükba mapang ka lir, pa jenjang ka tejakdangi tua 24buba nung lir aser Kidambi Srikanth jenjang ana asepzüka



lua tang 23buba nung lir.

Tetsür kija asaya nung PV Sindhu, shiba Spain Masters final tonga asayaogo, la jenjang ana asepzüka lua 11buba nung lir aser kasa mapang nung Saina Nehwal 31buba nung lir.

Tebur tarep asayar Satwiksairaj Rankireddy aser Chirag Shetty na masetshi-i trokbuba nung lir aser MR Arjun aser Dhruv Kapila na 27buba nung lir.

Tetsür tarep asayar Treasa Jolly aser Gayatri Gopichand na jenjang ka asepzüka lua 20buba nung lir aser tarep temeyoktep asayar Tanisha aser Ishaan Bhatnagar na 29buba nung lir.

## Taiwan Tir Tsai Ing-wen-i... (Tapak 7 nungi...)

Hombarnü tembangba drills ya taoba küm August ita US House Speaker Nancy Pelosi-i Taiwan semdangba sülen mitkar inyakim amabo masü, saka Japan-ia arja liasü.

Japan indang southernmost islands ya Taiwan anasa lir aser yangji Okinawa nung US airbase tuluka lir.

Japanese Defence Minister Yasukazu Hamada-i iba drills ya asetkong meketa tzüim aser anüing raktsüksü meranger ama asükum yimya amshiba lir, ta ashi. Taiwan ken o dak sendakba nung China-i yimya tamajung sayur ama ajiteter, ta Hamada-i ashi.

Tsai ya tir ama 2016 küm mezüing shimba sülen Beijing-i aisülen nungi Taiwan mesushia arur. Lai Central America nung Guatemala aser Belize semdanga liasü, kechiaser taoba

ita Honduras-i Beijing den tesendaktep akar ta sangdonga liasü.

Taiwan tarutsü tia lemtettsü nübur molung, ta Tsai-i ashi aser taoba mapanga Taiwan tembar tem den Beijing-i sen amshia tesendaktep yanglur ta aitsür. La tir akumba mapang Taiwan tembar linük 22 liasü saka tangbo 13 dang kumogo, ta ashir.

Yamaji süaka iba asetkong sorkari danga linük sorkar aika den tesendaktep yanglur aser US, United Kingdom aser Czech Republic densema linük balala nungi legislator tem agizüka arur.

2021 küm parnoki Lithuania nung de facto embassy ka lapok, koba küm 18 tsüingta Europe nung mezüingbuba liasü, aser ibaji ajanga Beijing ain adoka liasü.



New Delhi nung India tetsür Ice Hockey team jersey sayaba mapang tangokba noksa nung angur.

## BILEMDANGANG

"Mapa tulu tila mali; bendanga agüja dang inyakra temaotsü."